

Skipulagsstofnun
b.t. Jóns Ágústs Jónssonar
Borgartún 7b
105 REYKJAVÍK

Garðabær, 27. janúar 2022
Tilvísun: 202112-0054
SS
SS

Efni: Umsögn um matsáætlun fyrir færslu Hringveggar um Mýrdal

Vísað er til tölvupósts frá Skipulagsstofnun, dags. 21. desember 2021, þar sem óskað er eftir umsögn Náttúrufræðistofnunar Íslands um matsáætlun fyrir framkvæmd Vegagerðarinnar á færslu Hringveggar um Mýrdal.

Náttúrufræðistofnun veitti umsögn um drög að matsáætlun þann 1. febrúar 2021. Vísað er í þá umsögn hér á eftir.

Náttúrufræðistofnun hefur kynnt sér matsáætlunina og vill koma eftirfarandi athugasemdum á framfæri:

Brugðist hefur verið við flestum ábendingum Náttúrufræðistofnunar sem fram komu í fyrri umsögn um drögin. Bætt hefur verið við á kort og í greinargerð umfjöllun um svæði í Mýrdal sem Náttúrufræðistofnun Íslands lagði til árið 2018 að fari á framkvæmdaáætlun náttúruminjaskrár (B-hluta) og sem áhrifasvæði framkvæmdar liggur um. Þá hefur verið bætt við nýjum umhverfisþætti sem fjallað verður um í umhverfismatinu en það eru áhrif framkvæmdar á lífríki í Dyrhólaósi og í vatnsföllum á svæðinu. Þetta var atriði sem bæði Náttúrufræðistofnun og Hafrannsóknarstofnun lögðu til að yrði bætt við. Enn er nokkuð ósamræmi í notkun hugtaka þegar kemur að uppskiptingu svæðisins með tilliti til framkvæmdar matsins og ýmist fjallað um athugunarsvæði eða viðmiðunarsvæði. Þetta hafði Náttúrufræðistofnun bent á í fyrri umsögn og þörf er á að samræma betur.

Nýjum valkosti að vegleið, valkosti 4b, var bætt við eftir að umsagnir bárust um drög að matsáætlun og var það eftir að gagnasöfnun var hafin við mat á öðrum valkostum. Mjög mikilvægt er að mati Náttúrufræðistofnunar að tryggt sé að nauðsynleg gagnasöfnun til að meta umhverfisáhrif allra valkosta fari fram á fullnægjandi hátt. Þegar valkostum er bætt við síðar í ferlinu er hætta á að þeir séu ekki metnir á sambærilegan hátt og aðrir valkostir sem er bagalegt. Sumum gögnum þarf að safna á vettvangi á tilteknum árstímum t.d. upplýsingar um gróður, fuglalíf og lífríki vatns. Stefnt er að því að kynna umhverfismatsskýrslu að vori 2022. Ef t.d. gögn varðandi áhrif valkosti 4b á mófugla, sem alla jafna er safnað snemmsumars, eru ekki til staðar eða metin ófullnægjandi í samanburði við mat á öðrum valkostum þarf að veita svigrúm til að safna fleiri gögnum. Rýna þarf gögn sem þegar hefur verið safnað gaumgæfilega með tilliti til þessa.




Þá vill Náttúrufræðistofnun benda á að í umfjöllun um hljóðvist og áhrif sprenginga vegna jarðganga, þarf að leggja mat á hvort og hvernig sprengingar trufla dýralíf, einkum og sér í lagi fuglalíf í Reynisfjalli.

Náttúrufræðistofnun gerir að öðru leyti ekki athugasemdir við þá umhverfisþætti sem stefnt er að því að meta, þær matsspurningar og viðmið sem eru til grundvallar eða áform um fyrirhugaða gagnaöflun.

Benda má á að í töflu 6.1 er farið rangt með nafn Náttúrufræðistofnunar Íslands og hún nefnd Náttúrustofnun.

Náttúrufræðistofnun áskilur sér rétt á frekari athugasemdum á síðari stigum.

Virðingarfyllst,



Snorri Sigurðsson
Sviðsstjóri náttúruverndarsviðs.

